

偶

齋

詩

草

偶齋詩草內次集卷五

辛巳集

宗室寶廷竹坡著

良鄉旅舍題壁

征輶南去時此屋曾一住  
今宵復宿此難覓壁閒句  
九年再來老屋尙如故

過永安橋戲占嘲左恪靖侯

西陲五載駐元戎血戰天山萬里通  
底事還朝逾九月沿河惟見有微功

涑水店題壁

偶齋詩草內次集

卷五

一

西行渡易水懷古悲荆卿壯士不再作金臺基已傾東  
風振荒林猶成變徵聲

摘星陀

危陀立西嶺特起依附寡砥柱當雲衢銀潢不敢瀉祇  
愁太孤高眾星皆在下揮手拂彗孛精光乍滿把近日  
挺奇標誰與比肩者

使閩集

壬午

典試福建留別諸戚友

出使人同義牢愁我自存命嚴難戀闕 恩重又陳言

離索悲良友憂勤念至尊那堪兒更病瑣屑不須論

任邱題壁

連橋十二度征驂一片波光映蔚藍若使菰蒲變秔稻誰云風景異江南

宋遼分界古雄州一水橫流說白溝但得邊關有良將強鄰窺伺亦何憂

輿夫感暑死哀之有作

輿夫爲微利冒暑猝殞歿豈無妻與子一朝兩決絕死雖非我迫其端自我發致彼罹灾殃愧我圖安逸禍福

本無憑貴賤同一轍性命且如寄何須悲離別凡事有  
天命憂喜皆不必居易以俟之開懷莫鬱結

凌公堤

凌松林先生知雄縣有惠政捐資修河入  
祠名宦哲嗣怡堂亦知縣事復捐金修河

立碑河上土人  
呼爲凌公隄

雄縣西畔凌公隄凌公已去名在碑碑下老人指碑笑  
云曾見公年少時當年公子今老吏橋梓相承瘁民事  
公家與此信有緣兩代爲民治水利水利興水患止先  
志成衆心喜嗚乎循良亦孝子

過趙北口

天公有心恣遊戲江南風景移此地連橋十二帶長隄

茵蔯藁葭襍紅翠憶昔癸酉使西浙此地曾經景物異

洪濤遍野路不通星槎同乘車馬棄

余與正使徐季利自雄縣過南關上

船至距獻邑十二里始登陸備嘗辛苦

哀鴻隱泣逐龜龍藻荇爲糧魚作

餌水患未弭復苦旱頻年荒歉空儲積毒蛟虐魃結黨

行堯禔湯災一時萃聖朝救時得良相陽和布濩消

邪沴旣爲霖雨濟民生復課農桑興水利積久隱患一

朝除瘠土從茲多樂歲我行畿南數百里晚苗得雨已

補植三庚甘澍果應時禾稼遲收旱不害泥淖陷足拚

艱辛行旅雖難力田易但得時和歲復豐馬瘠僕痛皆  
快事自古足食乃足兵內患已安勿忘外

富莊驛用癸酉使浙題壁韻

奔波連日動征輶暑雨纏綿夕復朝行路多艱非爲險  
思家難見不須遙威儀赫奕心平淡僕從喧闐客寂寥  
漫道故園離漸遠鳳城迴首若雲霄

自涿州染病服藥久不愈悶而有作

莫耐征途苦愁懷知者稀路難偏遇病家近不能歸古  
道留殘雨餘霞散落暉匆匆拋好景車馬去如飛

阜城題壁用癸酉韻

重過舊地九經春旅館依然事物新却憶殷勤東道主

當年已是白頭人

癸酉過此王鏡吾  
尊人方知是縣

景州題壁用癸酉韻

蕭蕭夜雨送風涼藥氣芬芳散滿床迴首家園行日遠

莫言今夜未離鄉

前詩今夜依然是  
故鄉謂尙在直境

平原題壁

平原古人兩不朽趙家公子唐太守公子好客兼好酒  
十日酒杯不去口太守起兵推盟首兵機在心書在手



我來正逢新雨後南風驅雲逆人走晚禾補種青盈畝  
亂紅遍野襟短柳旅館倦息羅盤缶過門大嚼腹不負  
終朝傳食顏何厚我思古人自可醜辭出北京日未  
久黜陟不聞耳充琇天門迴望闔隔九使車叨乘  
恩渥受幸遭昇平躋仁壽文衡再掌衷愧忸去年此時  
君記否妖星出參芒如帚

過禹城有感

南行使閩過禹城疏淪遺跡湮莫指陵谷遷徙古今異  
濁河北移歸清濟轉漕水淺憂阻滯望洋改運帆輪駛

碣石夾右書尙存吁嗟明德誠遠矣當年治水域九州  
但治江河未及海安得大聖今復生普治瀛寰四洲水  
鑿通落滌穿尾閭一泄盡空淺見底三山隨刊摧若木  
烈焚沃焦咸池燬桑田涸乾同揚塵亥步新闢十萬里  
司徒敷教遍荒陬異俗盡使知倫理中天景運豈足侈  
平成位育歎觀止聖人不欲勤遠略飢溺急救非得已  
豈意後世變至斯防之不早應自悔下民昏墊至今極  
天不悔禍禍焉弭治亂從來往必復吾生安能親見此  
嗚呼吾生安能親見此

罄陽旅館望月有懷

作客歷三五行程過一千未知故鄉月可似此時圓

亦作

如何今夜月路險夢難到途長書孰傳清輝忍孤負獨也似故鄉圓

坐懶安眠

伴城題壁

海近風雨疾山開天地寬客懷方鬱鬱驛路更漫漫戀闕迷魂夢思家熱肺肝牢愁向誰語豈爲道艱難

蒙山行

蒙山之高遜岱宗蒙山之長與岱同東南斜走如青龍

一條直亘羣山中羣山旋繞千萬重俯首孰敢相爭雄  
龜山鳬嶧共穹窿登之魯小徵高崇當年顓臾主此封  
宗邦接壤稱附庸羈縻不能反與戎走險恐將強國從  
東魯自古崇儒風文德雖盛疎武功遠人不來先守邦  
足食足兵治道隆

寄焦山芥航上人

禪林傳定慧昔歲我曾游海仄門中過山輕水上浮新  
詩應早寄舊帶可還留

癸酉宿焦山戲做東坡  
故事留帶題詩以贈

驛路多

拘束歸來再繫舟

出蛟行

魑魅哭魍魎喜一蛟生萬民死石開雲裂妖物起黃泉  
挈上千丈水順流直下飛入海村庄城郭同如洗哀哉  
小民誠何罪家園性命同時毀我過吳越二千里目擊  
災區潛出涕稻秔湮沒存者幾何處能供太倉米使槎  
安穩飽甘旨坐視流亡亦可恥聖人飢溺思由已天  
下萬物同一體秋霖淋漓仍不止哀哉水災伊胡底

偶成

無材作舟楫援此昏墊苦空有利濟心敢再作霖雨伐

蛟雖古法空言亦無補前歲晉豫旱百萬開倉庾報災  
恨不早餓殍遍北土救荒貴神速實惠澤乃普錢漕不  
須吝愛民有聖主欲言口難開奇災空目覩

水口題壁

歷盡征途苦奔馳兩月餘尙難聞國事何敢望家書路  
遠心空切時艱志莫舒東溟波浪起翹首屢踟躕

福州使館

旅館無人靜不譁故園轉首杳天涯安排筆硯忘爲客  
檢點衣裝似到家斜照迴廊蕉尙綠秋風小院桂初花

那堪輪指歸期計棘撤重闌日亦賒

太平題壁

兩月辭家走使車辛勤才得過仙霞而今北望仙霞路  
萬水千山隔尙賒

保安橋題壁

聞嶠迢迢道路賒千山阻隔萬山遮今朝已過仙霞嶺  
從此行人可望家

仙霞嶺

仙霞嶺何奇竹多山自好巖壑同一綠修篁密如草朔

煙散晴空旭日射林杪清陰帶嵐翠隨風共縹緲拾級  
聊一登坡危徑旋繞古刹半山在樓臺出雲表聞越此  
要隘行人抑何少滄溟便一葦廿載荒驛道世運有變  
遷先事防難早歎息坐關門慨然傷懷抱

題焦山癸酉留帶卷子

訪舊來焦麓匆匆打槳還自憐人遜帶不得久留山

張夏題壁

老屋燈殘影不真滿村爆竹送聲頻十年兩度長清道  
旅館聽人祀竈神



家居集

癸未

偶成

榮辱窮通兩不關  
罷官何必見愁顏  
有風船可先時泊  
無雨雲當及早還  
若太乾坤容醉臥  
幾多歲月任偷閒  
宦囊自愧忘收蓄  
難買西郊舊日山

海棠溝題壁

我來海棠溝  
海棠花未開  
峭壁立幽澗  
亂草攬蒼苔  
萬物盡虛幻  
癡愛生未來

龍泉庵

萬綠聚一庭四時天常陰蒼山照無色紅日藏難尋濃  
陰入池水倒影光沈沈涼風忽迴拂衆籟同一音碧雲  
散水底偶露青天深靈虬此潛居局促難爲霖韜光慎  
自守網罟愁相侵

秘魔巖

我遊滴水巖造化駭靈怪茲巖較卑狹奇險亦足愛凡  
物貴越俗成器豈在大頑石空萬丈塊然晒荒穢

題靈光寺

壯志豪情一律刪怡然終日總懽顏攀巖自詡身猶健

照水方知鬢已斑世上難沽常醉酒人生能得幾年閒  
邇來儘享無官福四月之中四入山

書林篴雲扇時下第南歸

男兒生世閒讀書當救時文章能華國無用亦可嗤科  
名以人重何須爭早遲僥倖得速售躁進有識譏海雲  
嚙天起魍魎翻風飛不得釣鰲竿清波徒蹈危經綸貴  
夙裕臨事方無疑先賢緬忠定桑梓千載師三年彈指  
頃閉戶母荒嬉

送林篴雲

赤日灼東海萬里如探湯天吳遠避暑蛟螭水底藏之

子翻南行炎蒸何可當豈其念閭里承懽恩高堂同行

有詩叟唱和年共忘

妙峯同行

遠離兼久別握手彌感傷況

值時事難鬻觸方爭強魍魎逞技巧得意相披猖我年

甫卅四鬢毛漸已蒼閒居習疎慵朝夕酣杯觴報國

無奇才謀生乏良方身後名尙遠生前憂正長煮酒送

君行仲夏當端陽永晝恣炎熱流汗沾衣裳晴空一聲

雷好雨隨飄颻迴風聚亂雲縱橫傳電光天威赫斯怒

羣邪不敢狂百穀仰膏澤遠近同瞻望行矣慎勉旃有

志終能償匡時重經濟用世輕文章請纓懷古人勛業  
何輝煌翹首自浩歎南望天茫茫

昆明湖送高仲瀛之上海

去冬君送我明聖湖水中敲冰蕩雙槳衝破湖心峯今  
夏我送君昆明湖水上海風掀荷錢碧暈生圓浪人生  
難相見半年兩別離相見莫孤負少壯能幾時豈惟時  
地殊人事亦有異我旣詠休官君亦歎下第翹首望南  
溟血染蛟螭熱別離何足愁相期建功業

擔禮口題壁

左軍駐此修河

鍊騎三千入玉關火輪橫海竟生還健兒解甲春無事  
閒濬河流鑿碧山

襍詩

觀書爲引睡貪觀寐不得倚枕偶流眄窓紙已生白不  
覺字漸暗殘燈淡無色新蛩鳴一聲晨光透幃入

梅花不畏寒冒雪標清姿石榴獨耐熱烈日暄不萎萬  
物各有能采取須及時性違用難出扞格徒嗟咨紫薇  
百日鮮月季常滿枝凡葩足榮豔爛漫何足奇

我家多狸奴黑白羣自成每飯常依人聚食相關爭擊

案時一呼長鳴聲如磨形殊性未異久處亦有情  
登高望南海迢遞多浮雲交趾遠何在善戰思馬援銅  
鼓土蝕鏽炮朽聲不聞白雉幾時獻三代傳古藩蠻方  
能向化異俗原同文帡幪託宇下萬載基業存

望雪謠

北風晴南風雪雪暈日風暈月夏苦雨多冬苦風多望  
雪得風民如天何吁嗟民兮風亦苦雨亦苦風多無雪  
傷二麥雨多無日傷禾黍禾黍不收民荐饑雨多河溢  
居無所吁嗟乎甯苦風莫苦雨

夜作

閑居少僮僕夜靜人聲悄殘月上顏垣空庭滿荒草愁  
多愛睡遲病弱驚寒早壯志漸消磨營情但溫飽流光  
不相待四十已成老

病起遊冷家莊

我別揚眉山彈指六閱月秋山添紅樹遊人添白髮舉  
頭望奇峯一般撐瘦骨木石原無情盛衰亦倏忽春山  
如人少秋山如人老霜葉作花紅晚景亦彌好所愁寒  
風發餘妍豈長保韶光能再迴遊觀勿草草



晨興渡河登廣化寺度醜兒嶺早飯三家村循北  
山登一片石至寶珠洞小憩下平坡山宿靈光  
寺題壁

我登西嶺巔咫尺欲近天行人羨高峻得意如飛仙置  
身雖出人跋涉良苦難虎豹當道號虺蜥伏逕蟠歸來  
下平坡緩步逸且安高卑固迴殊風景亦足觀地低無  
險阻路坦易躋攀卽此自悔悟好奇嗤從前寄言善遊  
者量力休攀援

寄懷張香濤

登高西望路蒼茫千里雲山隔太行處事輸君真慎密  
不才如我太疎狂家貧愛菊仍多買身弱看書易健忘  
莫道年華未衰老病餘雙鬢又添霜

拭菊盆偶成

饗後暇無事下堦拭菊盆磨光復刮垢操作忘苦辛豈  
不厭污穢凡事須躬親佳卉無佳器胡以安其根海內  
多偏處南徼騰埃氛掃除愧無策微芳何足珍飽食難  
終日聊當博奕云豈敢學陶公運甓自習勤

咏菊

春芳夏卉開絡繹秋來結局推壽客氣清別成一樣香  
種多全備百花色豔質不沾富貴態樸野風流兩難得  
荒園佳色陶處士老圃秋容韓相國晚風三徑夕照黃  
曉寒一枝早霜白天付傲骨死不落後凋直欲笑松柏  
變化端歸造化工敷榮豈藉陽和力若使論花如論人  
不愧有才兼有德

子美移居巷東以詩見示倒用其韻和之

兄弟本同氣焉忍不相恕手蝮士斷腕一體尙難顧貧  
賤促分離借棹幾旦暮蜀道行樂歸定省仍一處大椿

八千年永護紫荆樹

子美與弟子右本同居因貧急擇居不得故暫分居大翁靈介肩先

生需次

四川

平生好詩酒猖狂喜同途  
詩勤酬酢嬾酒密禮貌疎不  
德亦有鄰爾我當近居謀  
國愧無福相與飽妻孥庸  
愚任人笑我輩豈丈夫

四十尙荒謬不朽安敢論  
罷官少喜事喜得詩人鄰  
作詩示我讀一讀一愴神  
析居尙有弟久離終有親  
朔風吹宰樹何處堪望雲

做裘贖新出舊綻猶未縫  
有衣不得著縮首僵如蛰  
宇

宙真寬大我輩能久容居停不忍逐容膝敢怨窮從此  
就荒徑時有羊求蹤

望月謠

望舒照臨九州遍今夕悵我獨不見虛空何處來浮雲  
清光上界仍無塵當年曾到瓊樓裏傲視羣仙嬾無禮  
一朝失足落紅埃兔躍蟾鳴各忻喜蟾兮兔兮毋自豪  
好風一來兮浮雲消浮雲消月重露照余肝膽仍如故  
風兮風兮胡來遲瞻天有日兮須待時慎葆此心兮勿  
使蟾兔知

湖樓小飲

暮景初冬好湖邊共小遊  
凍雲催暝色宴序益窮愁  
壯志頻傾酒豪情一倚樓  
燈光浮遠岸樹影聚寒流  
日不待夸逐天難寬杞憂  
南溟杳何處惆悵枉凝眸

喜志伯時潤至是日大霧

夢裏聞君至索衣先下牀  
老難逢故友窮未死他鄉雲  
薄日如月天寒霧作霜  
今生竟重見莫歎髡同蒼

孟冬之望與子美昆季小飲  
倣韓孟體聯句未成  
而去醉後詩興頗盛率成一章調子美

望舒初滿輪元冥始司令勝侶過幽居良宵增逸興習  
見主賓忘偕來昆季并聯吟相爭奇鬪飲互角勝春機  
嶺梅倡秋色籬菊剩星稀天宇寬木落月光淨撫時悟  
道理覽物感情性身閒念自忙疾去心仍病余甫病愈開落  
花無權榮枯草有命易居安以俟順受得其正東海備  
戈船南交勞鞍鐙時艱合建樹才疎難報稱獲鹿覺仍  
夢失馬弔爲慶此身拚棄置斯世遇明聖空費排擠  
心喜瞻寬大政勛名甘退讓詩酒任爭競作鬼難廢吟  
未死豈肯醒笑君已欲眠矜我先成詠

子美倒用前韻見和亦倒疊一首

自君結鄰居累我恣觴詠無日不傳詩每飯未嘗醒才  
高長互爭戶大爽并競詞壇少和盟酒國多苛政無能  
處貧賤有福值明聖秩卑君良屈官罷我自慶累重  
地莫勝願奢天難稱飢薦樂錦繡病馬怯雕鐙葵萎心  
結傾菊殘色枉正入蟄蛩知幾號寒鳥安命燒餘草存  
根烘開花致病靜觀時物情妙悟人已性回頭悔躁妄  
洗心悅清淨餘年生無幾故友死有剩天心通華夷世  
運遞敗勝百代真盛衰萬國大兼并沈醉寄悲憤長歌



寓比興勉作消寒社用度嚴冬令

冬夜與子美飲酒聯句用孟冬望日韻兼示伯時

貧仕愁京朝厚祿羨守令美秩卑易貽累職罷轉增興

竹離合豈有當哀樂固難并美數異理則同天定人莫

勝竹巷僻鄰不孤秋老菊猶剩美霜鍊樹聲焦風洗月

光淨竹韻險見詩情閒久熟花性美速貧乃稱喪不死

空負病竹有食羨厚第識字緣薄命美詞人喜初歸官

聲說煩正竹伯時爲綏定中外隔後先閩蜀各櫓鐙

守新奉諱歸

美去思欽口碑遺才赧心稱竹名存謗未弭草死莖尙

勁美

此韻余原作誤用幸字後改慶而子美和詩改勁字再改不貫兩存之

同病憐疎

狂當世幸

仁聖

竹

冠故仍楚囚書存感泰政

美

島夷

分爭強藩服共不競

竹

千日無此酒一醉誰肯醒

美

愧

乏東山望聊學洛下詠

竹

寒夜

朔氣乾坤滿漫漫宵正長代明賴孤月回暖盼微陽塞  
雪已難盡海風休再狂撫時空歎息獨立望蒼茫

霜氣白迷月海雲紅上天

近每黃昏黎明東西紅光燭天有霧日尤甚

驚心

見氛侵極目望烽煙講武何勞戰防邊不計年深宵下

堦步感事念如煎

憂憤孰相語擁裘聊醉歌那堪重水旱翻幸早兵戈越  
海新軍衆津沽舊骨多詩成頻看劍自歎鬢將皤

苦寒當晏序凜烈慎支持長夜終有盡陽春何太遲乞  
鄰愁失路附熱惜非時剝復機關重嚴凝豈自危

醉後與子美論詩頗不合偶成四句

雙鬢相看各似絲豪情未改少年時世閒無事堪爭論  
醉後曉曉共說詩

秦春帆

霖熙

爲醫腹疾甚效無以爲報適將之任

粵西作此以送其行

秋涼膺腹疾衰弱嘆難支庸醫怯攻補調和日益危君  
來進猛劑欲服懷遊移一杯甫入口滿體陽春回乃知  
天下事貽誤因多疑心細膽能大甫足稱良醫我疾猶  
未已君行聞有期業醫豈無人緩急堪恃誰遠方民多  
瘼亟需循吏治良醫比良相百里才可知陽剛勝陰柔  
寬猛相維持因循生畏蕙持重失事機粵西山水佳險  
遠通南夷棄襦關尙在銅柱今未摧酒酣欲同行病骨  
愁嶮崎臨風一執手南望增憂思

淨業湖酒樓與又章藝圃芷亭小飲偶成

玉衡指朔方葭琯陽未肇岑樓集良儔永夕酣清醪  
月照湖冰上下同一皓開襟共歡飲豈惜壺頻倒訂交  
會幾時相看半成老但願免衰病焉望常美好座中有  
羽客酡顏豐不槁醉後爲我歌餘音梁尙繞皎皎湖上  
鳥歷歷湖邊草白髮日以多故人日以少

夜作

五更雖云永長夜終有曉百年非不久人生終有老花  
開難常好兒生難常小醒時常苦多醉時常苦少少壯

尙不留富貴豈能保燒殘猶再生却羨原頭草

宵長不能寐遠鐘忽有聲繁音斷復續難辨四五更開  
門月將落斗轉參已橫寒空澹如水疎星光漸明不知  
憂何來但覺百感生百年已近半底事須經營

子美以詩見贈依韻和之

安攘虛同志詩酒遇宿好飲者留其名藏身以爲寶賓  
少增逋客囊空富吟槁買臣幸無妻蘇季愁見嫂謀身  
妬侏儒憂國慨蠻獠攬鏡豪情消請纓壯志杳驥跌  
乍驚馬驚休畏衆鳥土冷草難蘇幹孤樹易倒府怨衆

久叢牢愁獨常抱蛩吟已過秋雞唱須待曉道慚三教  
隘變羨六國小海深石枉填地廣塵莫掃時難萬民愁  
功成諸將老窮通敢命爭治亂惟天造相將盡一樽何  
須念三島

冬夜與韻清飲酒聯句

火酒滿腹當朔風一身表裏判冬夏竹枯腸磅礴芒角

生新詩瘦比黃花姹韻腥羶氣烈奪寒香淵明有知醉

應罵竹凌寒不改天然姿一枝獨占秋無價韻却嫌煙

火劇薰蒸不如籬邊早凋謝竹勁節本性勵自堅孤芳

豈與梅花亞韻風霜一例共摧殘嚴凝不爲奇葩赦竹

天公用意培幽姿冷豔非由人力借韻幸有空堂避凜

烈藏身安敢望高榭竹座旁花好不厭多市頭酒美何

妨贊韻壺中未竭豈忍眠不疑何卜忘晝夜竹痛飲盡

歷伯倫豪苦吟不讓杜陵霸韻酒酣忽憶越裳戰蠶食

過半貪未罷竹幾時高唱洗兵馬盡使蠻觸銜王化韻

夜深醉臥亂花中夢逐樓船粵瀨下竹

冬至用杜少陵韻

風霜獨逼苦寒月節序偏催近老人不見烽煙聊共樂



未亡朋友且相親  
銜杯此日開吟社  
珥筆當年賀帝宸  
雪滿占城消息斷  
縱橫誰可學儀秦

冬懷二首用東坡秋懷韻

陰陽有通塞  
安得無冬時  
若使如常情  
元冥先自悲  
小屋煙火足  
暖氣充房幃  
敝裘幸已贖  
焉用狐與狸  
晚菊始落英  
早梅已上枝  
微芳豈自主  
花事如相追  
護惜空費心  
榮枯應有期  
感此悟道理  
困窮絕怨咨  
服政年未至  
行樂何慮遲

山風西北來  
吹乾上天雨  
滕六倦未醒  
妖魅喜無語  
就

吟有故人移家隔一堵

子美移居間壁

交情亦何深廿年共貧

苦小阮時過從相留飯半黍行役憶去年辛勤泛南浦  
閒居難得食豈其厭馱馱仕隱各多愁有懷孰堪吐

### 季洪生百日醉後偶成

冬暖宜人意閒居喜醉眠尙餘賒酒處但少買山錢生  
子已百日罷官將一年傳聞南海上猶未息烽煙

寂寞蕭齋靜泥爐活火然斜風穿戶急午日對窓圓漸  
老喜添子常貧愁近年一樽聊自遣萬事有蒼天

### 夜作

睡起下階立人靜荒庭空殘月上枯樹疎星動寒風不  
知夜淺深忽聞遠樓鐘清景固可樂底事憂心忡老近  
氣漸餒閒久身轉慵悄然長歎息半晌歸房櫳

寒夜偶作

陰風欺殘燈穿櫺頻暗吹嚴寒侵微光搖搖澹無輝茶  
鼎何烘烘騰焰明紅泥空齋聊靜觀盛衰知天時

冬菊用宋子京海棠排律韻

秋菊冬猶好孤寒與性宜乾坤留傲骨冰雪試殘枝韓  
圃傳奇種陶籬賸冷蕤夕餐猶有待速采未過時佳色

人仍妬餘芳自不危唐花羞作態通草像生姿瓣萎心  
空抱根枯葉漸垂何須矜晚節那解怨春遲凍雨空勞  
冒狂飈且漫吹兩開徒企望半放已離披冷月憑臨照  
微陽賴護持松濤愁峻嶺荷蓋歎空池泛酒掇何苦調  
羹烹不辭延年持獻 壽蓬華祝 昌期

偶成

解憂堪貰酒況復對黃花官罷人同惜家貧我自嗟夕  
烽南海火古戍北庭笳何日銷兵氣吾生幸有涯

詠菊與子美聯句用東坡海棠詩韻

生憎佳卉不成木

美

草本耐寒天使獨

竹

春風偏媚牡

丹枝誰識天公亦隨俗

美

花農拔賣滿市城福薄焉能

種山谷

竹

強教活潑戒像生如扇如屏飾華屋

美

虛名

致禍學和羹醯醢薰蒸伴魚肉

竹

野葵鄙俚人共厭向

日猶能衛其足

美

莫歎西風劇苦寒生晚不逢春氣淑

竹

漫道出淤泥能不染荷蓋凋零堅水腹

美

歲寒新友又

添君忘年交欲攀松竹

竹

晉賢已遠餘古懽冬烘恰可

娛時目

美

佳色分種遍宇內不比海棠獨盛蜀

竹

美人

立月被縞衣道士淩虛控黃鵠

美

雨露滋根瘦不肥風

霜逼枝直豈曲竹愛惜幽姿勿棄捐保此遺芳莫輕觸美

### 拜官年

拜官年拜官年拜年却在新年前明日五更始朝天  
今日先去拜長官拜長官拜不得長官今日亦拜客先  
拜親王門後拜樞臣宅

### 送年禮

送年禮上官喜唐花最好貴無比不貴花頭貴花底三  
十年前根是金二十年來根化紙三織造兩關差禮單  
次第官單排禮重施報尙往來

祀竈神

祀竈神祀竈神願神上天休多言他事言尙可萬勿多  
言臣有錢臣家錢非祖積儻來俱藉錢神力錢神之力  
大且多爾神縱言如我何

偶齋詩草內次集卷六

養拙集

甲申

宗室寶廷竹坡著

元旦

朝陽燦爛照吾廬  
睡起蕭齋意自舒  
卅五年光又虛度  
三千世界此閒居  
興懷今昔愁看鏡  
放眼華夷愧讀書  
生事窮通奚足論  
未知時局更何如

立春

閉戶閒居日醉眠  
光陰忽入早春天  
小姬含睇笑相問  
攜我歸來已幾年



正月十二日作

閒居京邸歲方周報國無能枉杞憂忽聽生還班定遠今朝乞病欲歸休

試燈日同族弟師心竹善攜兒輩踏燈

薄醉長街步寒宵月未圓京城尙燈火海嶠正烽烟閒暇喜今夕繁華思昔年及時且行樂相與共陶然

元夕不出醉後偶成

元宵歡樂古今同□□□□□□□□□□衢塵影黑  
花燈遍地月光紅奪關空憶狄樞密讀易何勞宋相公

醉後蕭齋獨惆悵繞階喧笑任兒童

靈光寺書壽富題壁詩後

我幼來山寺到處常留題今攜阿大來亦復學題詩大笑問山靈我何如我兒

花朝同芷亭子嘉二道士育又章師心竹增韻清  
增偉人昆仲宗子右遊昆明湖

高橋俯空曠乘醉一攀登山遠煙如雪湖平水似冰尋  
春詩思愜感舊隱憂增莫歎兵難弭 皇清運中興

昆明韶景好結伴且遊觀佳節虛拋易故人常聚難水

聲知凍解柳色驗春寒漫說花朝到芳菲未一看

烽火

蛇豕方環視豺狼久暗藏內憂縱能弭外患亦難當未  
守何言戰先安始得攘珠崖漢曾棄奇策漫輕嘗

社日同文鏡寶大兒壽富西郊閒步晚飲酒家醉  
後作是日春分

羲和望舒勞逸均韶華九十今平分祈年田祖簫鼓紛  
祀社自古稱良辰鏡寶衰老詩絕倫邀我同出西城闌  
大兒聰穎粗解文從游扶杖忘苦辛柳黃草碧爭色新

捷足先占一半春  
百花怯寒甘後塵  
美人倦起酣夢魂  
遠山蒼茫影不真  
橫亘天半如連雲  
微風吹水細浪皴  
淺深新綠染未勻  
北方祀社風不聞  
舊典遺失名枉存  
去年河溢饑窮民  
賑貸無實辜

國恩荒歉屢見休  
怨神神縱愛民難  
強人我輩倖猶飽  
且溫及時覓樂毋  
因循君已望七我  
五旬無田可種貽  
子孫聊將詩酒傳  
家門

春日野遊放歌

天驟暖如人暴貴  
陡然氣象皆變更  
時花競開亂節序

枝垂條禪根不勝野禽得意忘縉繳向人高噪疑鬪爭  
飛蟲滿空逐人嘖揮之愈集頭頸盈連朝大風昨始止  
寒食已過猶有冰寒燠反掌改朝夕造化不測惟天能  
隔河楊柳誰氏塚紙灰堆積埋佳城荒墳遍地少麥飯  
夜臺亦此炎涼情山莊白石煥然在野老誰復知舊名  
雙林寺古亦銷歇有碑無字空崢嶸憂來聊就野店飲  
欲言稚子安解聽是日二兒從遊彈指前遊倏一載流光迅速  
良足驚功名富貴豈敢望聞身但願常太平

有感

水陣方聞捷山城倏失堅戰和猶未決勝敗任訛傳據險已無地成功惟恃天海門慎鎖鑰到處駛戈船

深憂二首和子美韻

醉後朱顏在春來白髮稠氣銷埋獄劍風阻濟川舟  
恩重身難隱時艱官幸休昇平誰可答空費杞人憂  
寥落藩封少紛紜勁敵稠空存交趾柱誰破洞庭舟  
世亂豈無已吾生賴有休廿年聞訓練今日復何憂

三月三日濯足戲成長句

三月三日風且涼出門拂面塵飛揚脩禊有約興頓阻

半途遄返慵尋芳歸來閉門濯我足聊復爾爾毋笑狂  
澄清願虛讓人副潔身而已姑徜徉倦來呼酒用自慰  
醉後興發窮愁忘吾聞當年營洛邑逸詩隨波歌流觴  
又聞置酒河之曲水心奉劍金生光盛集流傳二千載  
古今異世堪感傷周公已死不再作霸業難繼秦昭王  
我今有志除不祥淺水汙濁嫌池塘安得大海作浴器  
乾坤夷夏爲禊堂手持九州一蕩滌中山先被後越裳  
三神山巔睇朝陽呼起徐福燂蘭湯掬水澆熄占城火  
淨濯白雉看翺翔洪流萬里盡攪動魍魎失宅無遁藏

惜哉酒酣臥難起醉倒一夢眠匡牀

昆明湖同育又章宗子石閒步

河隄閒步思無窮有客偕遊感慨同一片荒山攢亂石  
半湖殘照滾東風又聞烽火連遙徼曾見鶯花滿舊宮  
廿載昇平誰習戰小舟來往往任漁翁

擬杜

海外方傳有捷音堅城再陷恨難禁奪軍誰作魏公子  
內相空勞陸翰林漫恃老師操勝算先憂挫銳阻兵心  
莫言烽火關山隔破竹行看寇日深



奪人難盡恃虛聲定霸宣威在此行越國廿年爲底事  
晉侯一戰竟何成舞干空說敷文德制挺安能撻利兵  
遙指斗牛連析木天船珍重備櫓槍

操戈同室首喃喃一唱誰將衆口緘寇準無功安免謗  
袁絲有隙更行讒屏藩已歎援難及門戶須知守未嚴  
豈但海波憂汎濫荆榛滿地尙忘芟

義輪欲墜枉迴戈誰是登壇馬伏波銅柱頻聞移更近  
金縉已說索彌多李綱氣餒難言戰魏絳心驕愈主和  
縱使珠崖拚棄去滄溟咫尺接天河

擬古

春雷一聲發雲霧開晦冥良宵共酣眠獨起立中庭朝  
陽猶未出景此孤月明翹首望薇垣衆星位如更天步  
方艱難歷亂緯與經銀漢連析津隱約騰攬槍四方同  
仰瞻躔度慎錯行下土有杞人安坐憂天傾

擬杜

事業回頭頃刻空傷心有始竟無終廿年眞比元公富  
三已何如令尹忠忍爲偏私忘誤國難將功罪論和  
戎勲勞却念怡賢好萬載同休祀典隆

櫻桃花

南山櫻桃多高下千萬叢陰澗未破萼陽岡盈樹紅豈  
其種類異寒燠有不同韶光難自主地勢拘天工時花  
恣妍麗轉眄均飄蓬一色亘四序澗底藏孤松

遊山三日資盡須歸悶而成詠

詩人云愛山胡不山中住幾時偶一遊信宿卽歸去豈  
其厭久靜中心多世故家貧隱亦難俗累疾成痼宦海  
十五年萬事悔迷誤暫時夢雖醒未必終身悟好花能  
幾時彈指春將暮長歎問山靈我來藏何處

送志伯時之廣平省親

太翁長子明先生守廣平因事開缺送部伯時前歲

丁內

艱

酌酒送君行相勸不成醉命乖家難多承歡歎無計天  
倫得團聚貧賤勝富貴親老喜同歸失意亦樂事功名  
何足惜所憂身多累甘旨慮難供原非競榮利人生有  
天命窮達聽位置鵲鴿久分飛和鳴聲勿異

和伯時韻兼示芷亭子美

花落春竟去酒醒人奈何無情空灑淚有恨且長歌樂  
事世閒少故交泉下多金丹難染髮一樣歎蹉跎

疎懶本天授窮通如我何身閒且酣睡酒醉偶狂歌  
暖花留少迴風絮聚多浮生容易過無事悔蹉跎

擬杜

兵車頃刻變衣裳天下紛紛賴一匡戰本危機端已啟  
和原美事患難防已無餘地軍仍退賸有虛名國未亡  
迴首周京四千載幾回白雉貢炎方

結遲菊詩社代柬

吾黨多詩人四時遞風雅寒暑藉消磨悲歡互抒寫行  
樂當及時一日詎忍舍秋光更可惜風月最瀟灑悠悠

天地閒誰是真閒者人生無百年能結幾詩社相期待  
重陽共醉東籬下烽煙何須憂天心眷中夏

和伯石

四海起風浪乾坤餘幾何驚心望烽火傾耳聽鐃歌朝  
右新交少軍中故友多陳伯潛寶琛張幼樵閒身容醉  
臥莫漫慨蹉跎佩綸皆會辦海防

擬杜

搔首乾坤大窮居獨閉門救時需善策報國恥空言敢  
避他年謗難酬舊日恩安攘須實事和戰漫徒論

擬杜

深恩大義兩難忘  
執意孤行詎免傷  
忍爲一身明去就  
坐觀四海誤安攘  
知人或恐同張浚  
避位偏思學李綱  
莫使名心雜忠藎  
戚休與共乃賢良

難云玉帛與干戈  
蒿目乾坤喚奈何  
空有儒臣爭主戰  
幾聞大將但言和  
權謀誰似虞彬甫  
矍鑠徒存馬伏波  
偃武息民原美事  
貔貅怪底聚多多

族弟心竹招看牡丹卽席分韻得國字

牡丹本凡豔  
唐人狂舉國  
虛花不結實  
富貴亦可惜  
蓮

子具苦心足標君子德亦有出羣材勞山高十尺

前作貶牡丹過甚續成一首聊爲解嘲

才色論天下何屑爭一國區區冠中華豈足矜絕色時  
花具木本獨立微骨格芍藥雖形似柔脆憐弱植富貴  
不爭先晚菊同隱德慎勿圖早開致藉薰灼力

與伯時子美芷亭阿洪聯句

故人已半死不死且同醉

竹

况當

國步艱自顧非壯

歲美

春來纔幾時飛絮已成隊

時

吟詠且尋歡局外莫

相議

芷

月色入窗淨蛙聲隔巷碎

洪

乾坤終有盡生世



原無謂

竹

一杯君勿辭獨醒何由睡

又

陶然亭與張香濤張幼樵張小帆

曾敷

張安圃人

駿

王雲舫

文錦

黃再同

國瑾

飲酒醉後偶成

不到江亭近十年  
歷觀風景尙依然  
蘆芽貼地平如草

山影黏天薄似煙  
笑我惟當飲醕酒  
問君敢否酌貪泉

香濤將之兩廣制軍署任

毋將一會看容易  
沉醉休辭杯再傳

七閩道路我曾經  
畧約吟成客試聽

幼樵如閩會辦海防

萬國帆

檣連海黑兩峯旂  
鼓夾城青

旂鼓二山在福州城外

已無奢願望

今世剩有離情醉  
此亭難得故人同  
建節臨歧含淚不

須零

偶成

樂少何由覓愁多那得刪有心皆是累無事尙難閒水  
遠慵趨海雲癡願在山生成本疎放況已鬢毛斑

香濤將行前一日移寓天甯寺塔射山房約再同  
小帆飲酒醉後成長句

天甯舊剎京城西千尋佛塔霄漢齊塔影落天不可覓  
裸花滿地紅雲迷紅雲深處青山低連山樓閣遮逶迤  
開門一瞥佛光入火珠逆射流金輝我來送客登禪栖

痛飲喜逢中夏時暖香湧起山四圍花氣倒捲隨風吹

酒酣忽憶昔年事山門曾見屯虎豹

庚申秋勝帥保屯兵於此壞雲

壓塔寶光隱百花叢裏翻朱旗山房高敞作軍幄雖有

酒食誰遊嬉迴頭陳迹踰廿載幸逢安樂停鼓鼙現在

有樂胡弗樂過去難管矧未來故人暫聚倍歡喜對酒

不醉何太癡名臣名士願分作君傳勲業吾傳詩醉來

興發狂欲飛高標翹首思攀躋試登絕頂願珍重陰苔

深恐生層梯

香濤將行作此贈之兼寄幼樵伯潛

纔看德遠去閩中把袂兼旬又送公應候空望作霖雨  
留行無計轉天風同朝故友皆離散幾日餘生況困窮  
自分杞人憂至死低頭不敢問蒼穹

三載河東始內旋那期旌節又南遷金門再覲知何  
日玉陛聯班憶昔年惜別豈真因戀友憂時非獨爲籌  
邊閒身敢論安攘事只說離愁亦黯然

星槎轉柁大江東儒帥登臺氣倍雄彬甫遙知能破敵  
深源何必效書空閒居難出乾坤外壯志都歸醉夢中  
幸值滄溟波暫靜軍門應許遞詩筒

閉戶窮栖近市廛不成廊廟不林泉傷懷家國期來世  
蒿目華夷悔壯年有志惟憑良友副無聊欲借好詩傳  
臨歧爭免偷零涕相對繁霜滿鬢邊

和韻清兼示心竹偉人

乾坤空濶一身輕未了惟餘死後名但願中山得美酒  
敢思南越請長纓傳家不倖留吾輩報國無能愧此  
生寄語將軍休好武丈夫只合學縱橫

靈光寺

半醉山亭望狂吟氣倍豪晚煙鋪地薄遠樹接天高有

命心應定無才身免勞浮生悔多事名重未能逃

偕汝明韻清壽富消夏靈光寺

清溪浸山根倒影石壁幽微風一搖蕩隨波沈復浮俯  
窺不見底穿穴疑靈虬藻荇擁紛雜時有羣魚游四方  
正苦旱萬姓饑同憂蹄涔難作雨不敢山外流

靈光寺

新景生舊境一遊一相異遊人自有心山林本無意幼  
曾此讀書彈指卅八歲少壯俄近老遊踪歲幾至掩耳  
聞泉聲閉目見山翠景俗心不厭四時各異致當年曾

有願宜成歸此地初服今久遂歸隱貧無計仕隱兩無成進退違夙志青山應笑人天下本無事

謝李畚曾

宗言

寄蘭

投贈亦常事君情厚且真獨將空谷種遠贈屏居人時

過待誰采香幽惟自珍也知難遽放

華已受傷  
葉半枯矣

懽悴稱

閒身

約子美飲酒

晴天宜同遊雨天宜共酌隨時可自怡人貴善求樂方今數詩人孰我二人若相呼共一飲拚醉幸毋卻傲廬

多草木幽僻儼林壑心靜勝身隱何妨住城郭魚肉雖  
弗備蔬果堪大嚼差強眠牀頭獨醒甘寂寞

立秋前一日分韻

蕭齋小酌集良儔陰雨連綿暑漸收傳語蜩螗須急噪  
明朝節序換新秋

擬杜

蛇豕原知勢劇狂無厭貪壑豈能償和拚忍辱難爲國  
戰縱連兵詎底亡就使匈奴圍漢帝終教獬豸服周王  
祇愁 泮主無良佐艱鉅仔肩孰敢當



南中守備久虛空得閒堪乘敵必攻剛說戈船窺馬尾  
又聞戰艦突雞籠姑容何果終貽害枉困張巡詎有功  
悔把輕狂誤忠直徒勞一疏達 宸聰

三伏日同人遊昆明湖晚宿葆真觀

昆明遊罷夜分時投宿琳宮觸舊悲方外不關軍國事

如何亦自有興衰

少時曾至此觀甚整齊今正殿已燬屋宇殘破矣

曉從葆真觀出緣河堤至湖上

晨興別琳宮緣隄聊躑躅晴空散微雲高樹上初旭長  
虹跨湖口石色皎白玉橋門對遠山偶見半峯綠荒蘆

帶朝煙隨風亂如竹芟荷不滿水紅翠斷復續村近樹  
陰連山迴塔影獨樓臺燦金碧摧殘望林麓愀然思昔  
事隱憂忽振觸餘生猶幾何爲樂須迅速

寄懷陳伯潛

世變至今極紛紜夷夏同人心思決戰天運欲和我應  
敵欽彬甫正名希鄭公前賢詎難繼拭目望奇功  
四海又新秋偷生自覺羞日遙夸尙逐天怒杞仍憂名  
爲狂愚得官因放佚休屏居亦無苦報 國隗朋傳

樂善園偶成

閒身落拓喜猶存  
世事興衰且莫言  
眼底松楸亡友墓  
墓在隔河  
亡友鍾碩甫  
夢中花柳舊王園  
豈因對酒方成醉  
祇論悲秋亦斷魂  
獨坐高岡一迴首  
萬山殘照亂雲翻

和子美積雨醉後懷幼樵原韻

訛傳幼樵被擄

夜雨晝不晴  
連綿暮始止  
暗風裂層雲  
亂星落積水  
窮居隱僻巷  
訛言空滿耳  
戰血難沾身  
垂首待餓死  
無才但苦吟  
鄙哉吾與子  
故人寄孤軍  
音斷五千里  
生死幸有天  
他族焉能使

和子美原韻約遊西郊

兵荒皆可死陋室何足危

原作積雨屋反重陋室良足危

中華多外患

萬古安樂稀濁醪如戰血早起已三杯豈真性耽酒有  
憂觸我懷一事堪傲君旦夕難斷炊餘生知幾多不遊  
將何爲

擬杜

鳳詔醲恩降雞籠露布宣劉錡洵宿將曹翽更爭先益  
見軍心奮方知聖意堅乾坤開戰局獨立望蒼天  
爲懼兵端啟急求和議成縱教盟不敗亦恐約難行已  
尙矜深慮人空惜盛名西平唐老將應識吐蕃情

雨夜與汝明壽富聯句

和盟廿四年基隆始一戰小勝何足喜中華氣一振

偶

莫使一勝狃勁敵方雪刃

汝

謀國須萬全當敵忌輕進

地廣難周防鄰多易啟釁仇深國祚輕民怒天心順

偶

伐崇宜紹文格苗敢效舜

富

九州頸血多修蛇吮難盡

偶

再忍豈人情縱亡亦天運順昌運奇功智勇諸軍冠

富

他族氣少懾吾徒志應奮

偶

何當投筆起一遂班超

願

汝

擬杜

閩嶠東南重輕拋付海濱書生衝大敵要地誤庸臣險阻誇千古籌防說幾春江千船塢好一旦讓強鄰

聞警已三日安危難確知忠臣甘死戰老友祝全師名重寇尤忌軍孤地更危國恩終可報雪恥幸遲遲

擬杜

海嶠徒望奏凱歌兵連禍結歎如何干戈暫息憂翻大渠帥雖殲寇尙多漫詔籌防已周密須知賞罰莫偏頗敵強休慮難堅守戰勝奚愁不易和

列辟紛爭跡已陳華夷聚處局翻新空將排解期他族

誰把縱橫學古人異類果然堪作助比鄰何竟不相親  
函關一啟諸軍困千古兵強獨讓秦

孫穀庭和前寄詩韻見寄疊前韻答之

窮途難與世相宜苦緒纏綿不暫離老近有愁惟縱酒  
心閒無用強吟詩寄身宇宙爲何事放眼華夷憶往時  
莫怪書來裁答晚愁懷怕使故人知

祝

嘏恭賦

舊贍朝衫質庫存官袍假得入

金門

龍樓煙散晴

天淨 鳳闕風停曉日溫幸得閒身逢 盛典惟將吉  
語報 洪恩兩階千羽銷兵氣權當萊衣舞 至尊

蒙

恩賞加三品銜恭賦

兩年守蓬華暫復入 朝門 聖世喜行慶閒身愧受

恩匡時難善策越分敢多言惟祝烽煙息無疆樂

壽萱

十月旣望 午門外朝房謝 恩恭賦

朝房門不掩獨坐已殘更落月平連 闕寒星曲抱城



當年登甲第曾此拜 恩榮迴首成何事新銜愧 聖  
明

示芷亭

無能戰疆場與君塵詩酒縱使勇冠軍丈夫亦可醜閒  
居恥長生立言羞不朽俛仰乾坤閒坐待成白首傳家  
書付兒報 國事讓友把筆不敢投閉門拙自守

冬至前四日作

陰極陽生歲欲終荒廬木落院虛空五更急柝催長夜  
萬點寒星動朔風元菟又傳烽忽熾赤嵌仍說水難通

杞憂不爲閒居減豈獨身家歎困窮

擬杜

亂離消息祝非真低首蓬廬意不伸  
稍喜南交重拓地忽驚東海又生塵  
難憑恩信羈藩服竟使干戈起比鄰  
一自將星沈遠嶠虎牢險戍待何人

冬至夜復與鏡寰壽富飲酒聯句

天冷酒偏熱人間詩自忙偶苦吟求句警  
慢飲爲宵長

鏡鏡燈影夜逾靜梅花暖更香富但能貧不死  
轉盼見春

光偶

懷育又章

菊花初放出青門葭管飛灰未返轅無福顯榮勤國

事有身勞苦報人恩

又章爲友事出口數千里

連山雪滿荒沙凍古

戍煙迷落照昏翹首塞雲遮不盡幾時斗室重開樽

朔風凜冽逼儒冠塞外嚴冬倍酷寒妻子詎知邊地別  
友朋猶作壯遊觀長途人馬平分苦貧士居行一樣難  
不敢望君歸及早馳驅但祝得身安

仲冬八日寄夏滌庵

朔風吹雪滿江干谷口雲迷竹萬竿佳景依稀心尙記

流光迅速指空彈

滌庵成進士後乞病養親在家讀書隱於漁里山中壬午仲冬八日余自

閩歸途經富陽冒雪訪之留飲至暮始歸舟滌庵夜復來舟三更始去

生存倖得身何用

死別雖殊見恐難  
傳語故人莫相憶  
窮居無事頗平安  
閉戶京華歲再周  
飢寒久歷且低頭  
石頑敢望蝸重鍊  
天遠焉知杞尙憂  
大海波濤何日靖  
空山著作幾時休  
眞儒當有安攘志  
那許煙霞久自由

偶成

風緊寒威急  
愁人酒易醒  
宵長緩更柝  
院小減天星  
憔悴將老艱  
危歎屢經憂  
來眠不得  
獨對一燈青

季秋買菊一叢入冬根下復開數花細巧可愛折  
插銅瓶中伴以紅梅偶成一絕

水淺瓶低且寄身韶光空洩不成春歲寒故友分離盡  
聊伴新交作隱人

餘意未盡又成七古題曰梅菊同瓶行

淵明和靖留詩魂千載而下爲比鄰君子淡交本如水  
六根清淨同離塵冰肌傲骨一般瘦與汝偕隱良前因  
和羹無福且泛酒歲寒共耐非爭春先開晚節互輝映  
韶光秋色相平分朔風捲樹萬卉槁松摧竹折嗟苦辛

莫言器小歎局促餘芳僥倖猶共存窗灰鑪火恣汙垢  
雖足雨雪難霑恩從來羣分若類聚隱逸結契惟仙人  
唐花附熱任得意玉堂富貴羞同論

花農將牡丹玉蘭  
同種用火薰開俗

呼爲玉  
堂富貴

### 和子美韻

白髮對樽酒乾坤一散人名因好詩著家豈罷官貧宿  
麥耐殘臘唐花傲早春嚴寒權閉戶愁踏市街塵

### 又倒用前韻示子美

天寒常有霧地凍不生塵永夜偏侵晝殘年豫占春病

多知老近時難稱家貧莫道吟詩易乾坤得幾人

立春

坐對辛盤意黯然吟情又入早春  
天詩人漫說春光好  
一度春來老一年

駕言集

廣化寺題壁

倚杖秋林立晚風故人遙憶久從戎  
彭田山下寒濤急  
霜葉應如戰血紅

廣化寺山坡靜室題壁

新霜下秋林衆葉各成色斑斕互相攙朱紫雜金碧秋  
山喜晚妝臨睡愈脩飾青女勝天孫雲錦不勞織化工  
好鬪巧不少留餘力三春放百花絢爛已臻極翻新染  
秋葉更欲春花敵以此悟文心移形厭陳跡人生重晚  
節衰竭劇足惜

河西歸登平坡山背至寶珠洞

蟠空小徑過山背落葉紛紛鋪遍地一聲清磬隔林來  
紅樹滿山不見寺扣門直入登高亭憑闌縱眺增吟情  
殘雲覆野暗山影斜陽幾道山外明老僧轉眴歸何處



太息禪門亦朝露

僧智明今秋八月化去

紅塵擾攘更奚論世間

何物能長駐故人持節守彭田

謂張幼樵

秋色雖佳豈暇觀

閒身自愧劇安逸側身南望增赧顏天涯極目海雲浮  
日落山空天地秋烽煙在耳尙無影暫時行樂休杞憂  
梵鐘幾杵催昏暮暮靄沈沈起深樹呼兒扶我下層巒  
紅葉隨人過橋去

靈光寺題壁

溪邊閒步索新詩水色山光意自怡忽聽晚鐘數聲動

驀然念我讀書時

幼讀書寺中晚鐘則歸家

終